

heln / liechte oder klare Myrrhen / geschaben oder gefeiltes Helffenbein / Lorbern / eines so viel als des andern / stossets zu einem Pulver / dann thuet hinzu vier Unzen gestossenen Nysoppen / Honig / vnd Weinberlein / jedes drey Unzen / das machet zu Pillulen / oder Kugelin / daß jedes einer Unz schwer seye / wann es vonnöthen ist / nemmet deren eines / lassets in einem Pfund weissen Weins zergehen / vnd gießets dem Pferd durch ein Horn ein: Mercket / wann das Thier schwach / vnd ihme die grosse Hitz beschwärtlich wäre / soll man ihme die Nas=Löcher / vnd den Kopff mit Essig vnd Wasser / darinnen Poley vermengt worden / reiben / gebet ihme auch drey= oder viermal Eyer / in drey oder vier Gleser weissen Wein durch ein Horn ein / dann die Eyer stillen den Husten / der Wein aber gibet Kräfte / vnd machet frölich.

Ein dämpffig= oder döbiges Pferd zu recht zu bringen vnd Leibig zumachen.

Nemmet Baumöl / Butter / Schmier von einem Schweinbeern / jedes zwey Pfund / dieses lasset wol mit einander schmelzen / dann seihet es ab / dann Meel von Fenum Greum sechs Unzen / gestossenen Leinsaamen sechs Unzen / geschabenen alten Speck von einem Schwein=Beeren vier Pfund / mischet alles durch einander / hernach nemmet geweyhet Wachs / Wind=Wachs / Dattel=Latweg / Cassia / eines jeden zwey Unzen / Saffran ein Unz / klein gestossen Salk zwey Pfund / geriebnen Zucker sechs Unzen / Aloes ein Unz / dieses alles wol gestossen / vnd mit einander vermischet wie ein Salbe / gebets dem Pferd zu Morgens ein / aber es muß den Abend zuvor vnd die Nacht vber / ganz kein Hew oder Stroh geessen haben: Vnd nach deme es diese Arzenei bekommen hat / solle es in fünff Tagen darauff auch kein Hew oder Stroh essen. Wann die fünff Tag herum seyn / könnet ihr ihme wider eines geben / vnd so die Arzenei nicht so bald wircken thäte / gebet ihme frisches Wasser / vnd darauff Getränck vnd Kleyen.

Ein Pferd in vier oder sechs Tagen Leibig zu machen.

Ihr sollet ihme alle Tag Morgens vnd Abends ein Getränck von Hirschebrein=Meel vnd warmen Wasser geben.